

Julio Maduro:

Bon madrasa, mal mama??

ORANJESTAD(AAN)- Sr. Julio Maduro reaccionando ariba e articulo di Sr. Harms cu a sali den DIARIO a bisa lo siguiente. El a bisa cu no ta cu poco asombro cu el a leza e sugerencia di Sr. Clyde Harms, pa conserva e edificio di Turismo (Arnold Schuttestraat) o si esaki no ta posible pa en todo caso yama e Plaza. Maarten Noot-plaza.

Cu asombro, sr. Maduro a sigui bisa, pasobra no ta mucho di a pasa cu Ministro Booi a bay

Tele Aruba y a demostra a base di mapanan cu e edificio aki lo ser manten y conserva. Pa esnan cu conoce e materia Ministro Booi a papia mentira, ya cu desde e principio di e planan pa regala e warda di poliz tabata inclui e desaparicion di e oficina di turismo como parti di e infraestructura.

Na e sitio ey lo bini un parada (parkeerplaats). Tin mas edificio cu lo mester ser cumpra y sacrifica ariba e altar di conveniencia o interes personal di

algun incluyendo e edificio cu awendia ta contene Museo Arquelogico.

Sr. Maduro a sigui bisa cu e sugerencia ariba su mes ta simpatico, aunke e argumentonan ta fofo y no ta cuadra cu berdad den su totalidad, mientras tin a menos 4 (cuatro) Arubiano cu tin mas y mehor derecho y preferencia ariba tal honor.

Sr. Harms e.o. ta bisa cu e persona involvi a lucha hopi pa haya e edificio for di e Gobierno Colonial. Cu e lo a lucha pidiendo esey ta sigur. Pero e mes no tabata un exponente colonial?? Sr. Maduro a bisa. Y si bo leza historia di tal epoca bo ta yega na e conclusion cu pa di tanto bez ta adula un exponente colonial, mientras cu Aruba tabata tin representante den Gobierno Central.

Segun e argumento e representantenan, entre nan difunto Henny Eman no a cumpli cabalmente y Aruba mester a depende di un exponente colonial pa actua.

Sr. Maduro a sigui bisa cu tin hende cu te awe no ta comprende ni tin saber di e lucha pa liberacion di e Pueblo Arubano cu lo mester culmina den Independencia dia 1er di Januari 1996. Talvez nan no tabata biba

na Aruba o podiser no tabata tin interes.

Pa loke ta toca su labornan scapando bida di tanto hende ariba lamar riscando su bida, sr. Maduro a bisa cu esaki ta berdad. Pero no ta asina cu e tabata e unico na Aruba. Tur esnan cu a traha na Eagle o na Lago durante guerra a expone nan mes na e mes peligro. Tur bao condicionnan malo.

Tampoco ta asina cu e tabata bay cu un jola remando ariba alta mar en busca di hende pa salba su sol. No; tabata tin otro marineronan, Sr. Maduro a bisa. E remolcador y botonan di loads tur tabata tin tripulacion. Tur tabata subi lamar. E a menos tabata tin un bon posicion y bon pago. Y siguramente e no a bin Aruba pa amor.

Ademas e tabata hefe di Departamento (Havenmeester) Ken otro mester a cumpli cu cierto tareanan? Ami? Sr. Maduro a puntra.

E guerra di submarino a dura relativamente corto y no durante henter e periodo di segunda guerra mundial. Cu e no a ricibi honra oficialmente?? Centenares di Arubano cu hopi mas merito a muri sin ta ser recorda.

Sr. Julio Maduro a bisa cu cada vez cu e pasa na e sitio ey e ta corda ariba Redulfo Arends, Jacobo Arends, Bannan Capriles y Tiago Tromp tur di feliz memoria. Hombenan cu apenas a mira porta di school. Pero Arubianonan grandi cu tabatin astiler pa construccion di baro, dunando hopi hende empleo den tempnan mashar malo incluyendo e promer guerra mundial.

Awe tin "Swain" wharves, pero nos no kier recorda e gigantenan di antaño, Sr. Maduro a bisa. Y e tempo gobierno no tabata percura pa infraestructura ni tabata duna "garantia".

Sr. Maduro a bisa cu di su banda e lo desea cu un di e gran Arubianonan aki un dia lo ser recorda y honra pa su aporte. Ta pesey cu e kier a trece esakinan padilanti. No pa mengua e posible grandeza di Sr. Noot d.f.m pero si pa duna na e Arubianonan loke cu pa logica, derecho, razon y gratitud postumo ta toca nan. Pa evita loke a caba di pasa na San Nicolas, unda un persona cu mashar poco a haci pa e pueblo Arubano na San Nicolas a ser honra, lubidando e Arubianonan cu si a aporta grandemente.